

'A 'ncirata

Mi ricordu
chi un jornu me matri
nà 'ncirata russa
m'accattau pi' putirimì
di l'acqua di lu celu
arriparari e
di lu raffridduri
nun mi fari pigghiari.
Ogni matina
prestu pi' ghiri a scola
mi susia
mentri lu friddu
ni l'ossa scinnia.
Lu ventu
darrè a finestra sintia,
ma lu caluri di me matri
mi quariava
e la ducizza di li sò paroli
mi ralligrava.
Prestu me matri
un pezzu di pani
e quatru nuci
nì la borsa mi mittia
e la 'ncirata
attornu a lu coddu
mi strincia.
Quanti cursi fici
cu lu ventu
chi mi l'allargava
e cu li me vesti
iddu jucava.

Eranu ali li me vrazza
e mentri lu friddu
la facci m'arrussicava
cu' la fantasia
aceddu ju divintava
e supra li zotti d'acqua
vulava.
L'acqua dintra a 'ncirata
mi trasia
e stuzzicava la mè alligria.
Ogni jornu
purtava a la casa
di la giovinezza la friscura
e me matri m'abbrazzava
cu' primùra.
Lu profumu
di lu manciari
pi' li scali si spannia
e ju ni la cucina
subitu trasia
dunni tutta a famigghia
era riunita
e ju mi sintia
di la vita favorita.
Stà 'ncirata pi mia
è simbulu di sirinità
e mi ricorda
la mè virdi età.

Donna Pippina

Donna Pippina
era 'a criata da me casa
e la riviu
acruccata e nica
cu' la facci
di vita affaticata.
L'occhi acquusi
la tristizza di lu cori
traspàrianu
e li manu
arricamati di vini
li sirvizza
chiù umili facianu.
Mi ricordu
chi vicina a idda
la sira mi mittia
supra nà siggitessa.
a lu friscu di nà vanedda.
Quanti cunta,
quanti razziunedda
cu vuci chiana
idda mi cuntava
e lu me cori si ralligrava.
Li me occhi si dilatavanu
mentri li me pinseri
supra l'ali di la fantasia
vulavanu.
Idda nù munnu fantasticu
cu la so' vuci mi cunnucia
e sognari cosi impossibili mi facia.

Donna Pippina
era di Diu timurata
e Lu ringraziava
anchi si facia la criata.

'A vancata

Davanti 'na casa
spissa di mura
c'è 'na vancatedda
dunni c'hannu passatu
nutrica, picciriddi
vicchiareddi
puru li piatti e li furchetti
ad asciugari e
li robi bianchi misi
a 'mbiancari.
Oh! Si putissi idda
a nui parlari!
Li ciarli idda
cuntassi di la genti,
li sogni chi facianu
li picciutteddi,
li vasi chi si davanu li ziti
mentri a matri
facia finta di nenti.
E quantu minnuliddi
supra idda si schiacciariu
e quantu nuci
i picciotti si manciaru!
Quannu lu suli
poi vutava e l'ummira
a vancata cummigghiava
attornu a idda
tutta a famiggia si riunia,
cu arriccamava,
cu a quasetta facia,
cu l'arnisi s'aggiustava



61

Sicilia

e cu un pezzu di pani
e caciu si manciava.
Idda avia lu postu d'unuri
e quannu tra li stiddi
la luna di luci
l'allagava
attornu a idda
a famigghia di tanti cosi parlava.
'Na paci santa
ni stu locu scinnia
e puru lu cani
longu si mittia
pì sintiri l'Avi Maria,
li Gloria a Patri
e la litania...

'A ciappula

Nì la vita
ci sunnu tanti
'ciappuli parati:
sarà pi mia
sarà pi tia sta vota?
Pi tutti su priparati.
Su 'ciappuli
dunni 'mmatula t'affanni
quannu ci cadi.
Chi 'ciappula timuta
è lu duluri!
Duluri di lu corpu
o chi turmenta
lu spiritu firutu.
D'idda ti vulissi libirari,
ma un t'arrinesci
e tu nun poi scappari.
A 'ciappula chiù tinta
è chidda di la morti.
Ma chista è la nostra sorti!

Notti d'estati

Lu celu
stizziatu di stiddi
cummogghia la terra
chi dormi.
Un vinticeddu
friscu di marina
tessi musica divina.
Tra li fogghi li cicali
cantanu la ninna
a li ciuriddi
mezzi 'nzunnacchiati
mentri a notti
di paci suspira.
Nì li casi
s'arriposanu pinzeri
si senti sulu
nì la notti funna
lu cantu di nà matri
chi sciogghi amuri
supra un nutricheddu.
Ridi nà funtanedda
chianu chianu
mentri a stanchizza
vola luntanu.
Scinni la notti
e cogghi nì li manu
lu ciatu di la genti
chi arriposa.

Quadrettu d'Austu

Un feu
un bagghiu di casi
'n arvulu sulitariu
di lu ventu marturiatu.
'U suli 'mbianca
e spacca li cuti
riddi satanu
'nfucati 'mezzu li ristucci
'nna addina carcaria
'nni lu fittu silenziu
un vicchiareddu
supra 'na vancata
s'arriposa
'na naca è china
d'un beddu nutricheddu
tri picciriddi
mancianu miliddi
'na matri
stenni li so' panniceddi
mentri 'u maritu
di sudura arrimuddatu
torna a li casi
pì manciarisi n'uviceddu
cu pumamuri e basilicu...
arriminatu
un cani
cu la lingua a pinnuluni
movi la cura
pi farici festa
mentri un attareddu
miaà dintra 'na cesta.

Sira d'immernu

Mentri lu ventu
cu la sò rabbia
i finestri scutulava
ju li manu
supra la tannura
mi quariava.

A li voti
me matri a' accattari
du sardi mi mannava
e puru un poco di
sapuni moddu pi' lavari
ci pertava.

Lu lumi
l'ummira nì li mura
facia ballari
mentri me matri
quattru favi na lu quararu
ia a cucinari.

Poi ni lu lettu
lu circu mittia
e lu caluri
nì li linzola
si spannia.

Prestu ju mi curcava
e sutta li cuperti
la testa mi mittia,
mentri lu lamentu
di lu ventu
straziava l'arma mia.

'U scantu di lu scuru

Teni 'a matri
strittu a lu so' pettu
'u picciliddu
chi nun pò durmiri.
L'ucchiuzzi duci
misi a pampinedda
lu ciatu lento
chinu... di chissà quali spaventu.

La matri
chianu chianu l'anninnia
ci canta
'na duci canzunedda
sempri chiù forti lu strinci
a lu sò pettu
pi' alluntanari
lu scantu di lu scuru.

Lu lumi ferma
'sti dui ummira
a lu muru.

'Na canalata
cu l'acqua di lu celu
si lamenta,
'u ventu
strinci forti la campagna,
un tronu si senti
a la luntana.


'A matri
'u picciriddu annaculia.

E a matri
chianu chianu
l'anninnia...

e a matri
chianu chianu
l'accarizza...
e a matri
chianu chianu
lu cunorta.
Lu scantu di lu scuru
scumpariu
e l'ancileddu
l'ucchiuzzi chiuriu.

L'Ancilu

N'àncilu, ogni tantu,
mi veni a cunsulari
e mi dici:
-Nun ti scantari
si nì la vita tanti
guai tu à passari!-
Lu vidi ci sugnu eu
assemi a tua
e ti dannu a manu
Gesù e Maria.
'Stu fattu allura
mi fà ancora spirari
e cercu di tirari,
cu chiù rassegnazioni,
a campari.
Ma a li voti
st'ancilu
eu nun 'u sacciu
fari parlari
e la disperazioni
a me vita veni a fasciari.
Ma, capisciù 'na cosa:
si lu vogghiu
sempri cà cu mia
nun mi devu turmintari
cu dumanni a cui
risposta dari
e mi devu abbannunari
nì li vrazza di la fidi
pi' putiri
li timesti di la vita
supirari.



Curaddi d'amuri

Mudernità

A li voti
dicu e mi dumannu
chi si li genti antichi
putissiru turnari
sicuramenti s'avissiru
a spirdari.

Machini, mutura,
radiu e tilivisura
certu ci facissiru
passari un bruttu
quartu d'ura.

Pi nun parlari
di l'aeruplani.

Aceddi di ferru
chi volanu nù celu
a iddi ci parissiru
e milli priori
pi paura facissiru.

E li fimmuni
mezzi nudi e tutti scullacciati
ci facissiru rimpiangiri
di ni stu tempu
nun esseri nati.

Truvassiru nu' munnu
nà rivoluzioni
peggio di chidda
di Napuliuni.

Chista è modernità
chistu è tempu
di cursa e di disperazioni.

A vulirini beni
nun semu chiù boni.
Forsi era megghiu
lu tempu passatu
quannu in paci
in famigghia sirenì si criscìa
e si passava la vita
in armunia.